

Turkiston

1925-yildan chiqqan boshlagan

«Kamolot» yoshlar ijtimoiy harakati Markaziy Kengashining nashri

www.turkiston.uz

2014-yil 12-fevral, chorshanba № 12 (15754)

Hafta taassuroti

«СЎЗ ИЛА ОНЧА ГУҲАР СОЧТИНГКИМ...»

Миллат даҳоси, халқнинг интеллектуал қиёфаси унинг олиму фозиллари, шоиру адиблари тимсолида намоён бўлади. Алишер Навоий халқимизнинг ана шундай маънавий тимсоли, даҳо фарзандларидан биридир. Ўтган ҳафта буюк бобокалонимизнинг таваллуд айёми муносабати билан юртимизнинг барча маърифат масканларида байрам тадбирлари, шеърят кечалари, адабий учрашувлар ўтказилди. Уларнинг ҳар бирида шоир шахси ва ҳаёти, ижодий меросига бўлган чексиз муҳаббат ва эҳтиром сезилиб турди.

Пойтахтимиздаги Алишер Навоий номидаги Миллий боғда улғу шоир таваллудига бағишланган тантананада иштирок этган адабиёт муҳиблари, шеърятга ҳавасманд тенгдошларимиз-да ўз эҳтиромларини шоир ҳайкали пойига қўйган гулдасталари билангина эмас, тадбирга тайёрлаган бадиий чиқишлари, сўзлари, ўқиган шеърлари билан ҳам ифодалашди.

Навоийдек зотлар фақат бир халқ ёки миллат эмас, Она замин фарзандлари саналадилар. Бугун Навоий шеърятини нафақат ўзбек ва ёхуд барча туркий халқлар, шу билан бирга Шарқу Фарб халқларининг бадиий мулки, маънавий бойлигидир. Йиллар, асрлар оша унинг ижодига бўлган қизиқиш, хусусан, Европа мамлакатларида ҳам ортиб бораётгани бежиз эмас. Негаки, айрим миллатлар ўзликни йўқотиш даражасига келиб қолаётган, миллий ва умуминсоний қадриятларни унутиб бораётган ва ниҳоят, инсонни инсон этиб турган барча фазилатларнинг асоси — маънавийдан узоқлашаётган бугунги замонда ақлу тафаккурга суянган халқлар башарият фарзандлари саналмиш мутафаккирлар ижодига янада кўпроқ эътибор қаратмоқдалар. Уларнинг сўзларига қулоқ тутмоқдалар. Истиқлол йилларида Алишер Навоийнинг йигирма жилдли мукамал асарлар тўплами нашр этилгани, у зотнинг ҳаёти ва ижодига бағишланган фундаментал тадқиқотлар амалга оширилгани, илмий ва бадиий асарлар яратилиб, кенг ўқувчилар оммасига ҳавола этилгани ва бошқа шу каби эзгу ишлар моҳиятида юксак маънавиятга интилиш, ёш авлодни етук инсон этиб тарбиялаш сингари улғувор мақсадлар бор.

Тантанали тадбирда сўз олган шоирлар, адабиётшунос олимлар, меҳмонлар Навоийнинг халқимиз ва жаҳон халқлари тақдирида, дунё адабиётида тутган ўрни ҳақида сўзладилар. Жумладан, Польша Республикасининг Ўзбекистондаги Фавкулдда ва мухтор элчиси Мариан Пшезьдзецки шоир даҳосини эътироф этар экан, энди поляк халқи ҳам Навоий шеърятидан ўз она тилида баҳра олишидан мамнун эканини изҳор этди.

Эй Навоий, сўз ила онча гуҳар сочтингим, Баҳру кон кирди қаро ерга сенинг килкингдин, — дея лутф этади мутафаккир шоир бир асариди. Бобокалонимизнинг сўз ила сочган гавҳарларини термоқ, уларни ўрганмоқ ва ўқиганларимизни теран англамоқ, авваламбор, биз, ёшларнинг бурчимиз эканини унутмайлик, азиз тенгдошлар.

Тадбирда Ўзбекистон Республикаси Президентининг Давлат маслаҳатчиси Х.Султонов, Ўзбекистон Республикаси Бош вазирининг ўринбосари А.Икромов, Тошкент шаҳар ҳокими Р.Усмонов иштирок этди.

Элмурод НИШОНОВ,
«Turkiston» муҳбири

«Turkiston» savol beradi

O'Z POZITSIYANGNI NAMOYON ET!

«Turkiston» savol beradi» медиа лойиҳасида илк мартаба «Kamolot» ёшлар ижтимоий ҳаракати Қорақалпоғистон Республикаси кенгаши-раиси Жолдас Абдижамил-ов иштирок этди. Ёшлар етакчиси газетамиз муҳбирига берган интервьюсида уюшмаган ёшлар билан ишлаш, ёш кадрларни тарбиялаш ва ёшлар муаммолари билан курашиш йўллари, етакчиларнинг салоҳияти нимада эканлиги ҳамда нега маҳаллаларда Ҳаракатнинг бошланғич ташкилотларини ташкил этиш кераклиги ҳақида гапириб берди.

Тафсилотлар билан 4–5-саҳифаларда танишинг.

ТАЪЛИМ ВА МУТАХАССИСЛИК — ТАНЛАШ ИМКОНИЯТИ

Кеча пойтахтимиздаги Ёшлар ижод саройида «Таълим ва мутахассислик» X халқаро кўргазмаси иш бошлади. «Kamolot» ёшлар ижтимоий ҳаракати, Олий ва ўрта махсус таълим ҳамда Меҳнат ва аҳолини ижтимоий муҳофаза қилиш вазирликлари, Ўзбекистон Савдо-саноат палатаси ва бошқа идоралар, Тошкент шаҳар прокуратураси ҳамкорлигида ўтказилаётган ушбу кўргазма учта павильонда жойлашган.

Кўргазма иштирокчилари асосий павильонда мамлакатимиздаги олий таълим муассасалари, унда мавжуд касб ва мутахассислик йўналишлари билан яқиндан танишади. Бу ерда таълим

соҳасида яратилаётган имконият ва энг сўнгги ютуқлардан хабардор бўлиб, ўзлари истаган касбларини танлаш имкониятига эга бўлишади. Иш излаётган тенгдошларимиз эса биринчи

қаватдан ўрин олган Тошкент шаҳар меҳнат ва аҳолини ижтимоий муҳофаза қилиш бош бошқармаси, «Ўзбекистон ҳаво йўллари» ва «Ўзбекистон темир йўллари» компаниялари, «Билайн», «Akfa»,

Kun mavzusi

«Қуюв механика» заводи, «Оникс», Тошкент лак-бўёқ заводи каби бир қатор корхона ва ташкилотлар ҳамда ёшларни иш билан таъминлашга кўмаклашувчи марказдан янги иш ўринлари ҳақида маълумот олиб, ўз мутахассисликлари бўйича ишга жойлашиши мумкин. Хорижий олий таълим муассасаларида таълим олишни ёки чет тилини ўрганмоқчи бўлганлар учун бир қатор хорижий давлатлардаги олий таълим муассасалари ўз ўқув дастурларини тақдим этиб, мутахассисликлари билан ёшларни таништирмоқда.

(Давоми 2-саҳифада)

ТАЪЛИМ ВА МУТАХАССИСЛИК — ТАНЛАШ ИМКОНИЯТИ

(Давоми,
боши 1-саҳифада)

Кўрғазмадан ўрин олган «Ифбатли келин» ва «Машриқ машъали» ўқув марказлари ҳунари ўрганмоқчи бўлган ёшлар билан гавжум. Бу ерда бир-бирдан бетакрор қўл меҳнати ёрдамида яратилган турфа хил маҳсулотларни кузатиш, уларнинг қандай яратилишига ҳам гувоҳ бўлиш мумкин. Бу каби қўли гул тенгдошларини кузатаётган йигит-қизлар ўзлари қизиққан йўналишлар бўйича марказдаги тўғаракларга аъзо бўлишяпти. Бундан ташқари, кўрғазмада «Камолот» ёшлар ижтимоий ҳаракатининг маҳсус бурчаги ҳамда «Карьера», «Авто-тест», «Бизнес мактаб» ва бошқа ўқув марказлари билан ҳам танишиш имкони бор.

Анъанавий тарзда ўтказиб келинаётган «Таълим ва мутахассислик» халқаро кўрғазмаси ўқувчи-ёшларни юртимиздаги олий таълим муассасалари, унда мавжуд касб ва мутахассислик йўналишлари билан яқиндан таништириш, таълим соҳасида яратилаётган имконият ва энг сўнгги ютуқлардан хабардор этиш ҳамда ўзлари истаган касбларини танлашга кўмаклашишга қаратилган. Шунингдек, ёшларга бўш иш ўринлари ҳақида маълумотлар бериш ва уларнинг бандлигини таъминлаш ҳамда ёшларни кичик бизнес ва хусусий тадбиркорликка жалб қилиш ҳам лойиҳанинг асосий мақсади ҳисобланади.

— Президентимизнинг 2014 йил 6 февралдаги қаро-

ри билан тасдиқланган «Ўзбекистон Республикасида ёшларга оид давлат сиёсатини амалга оширишга қаратилган чора-тадбирлар дастури»га мувофиқ ташкил этилаётган ушбу кўрғазма Ўзбекистон таълим ва кадрлар тайёрлаш тизимидаги энг йирик тадбирлардан биридир, — дейди «Камолот» ЁИХ Марказий Кенгаши бўлим мудири Фазлиддин Баркашбоев. — Бу йил нафақат маҳаллий олий таълим муассасалари, хорижий университетлар филиаллари, ўқув марказлар, балки республикамизда мавжуд йирик корхона ва ташкилотлар, қолаверса, Ўзбекистон Республикаси Меҳнат ва аҳолини ижтимоий муҳофаза қилиш вазирлигининг Тошкент шаҳридаги бандликка кўмаклашиш марказлари ҳам ўзларининг бўш иш ўринлари билан иштирок этаяпти. 2006 йилдан буён кўрғазмада республикамиз ва хориждаги етти юзга яқин олий таълим муассасаси, юздан ортиқ ўқув марказлари иштирок этди. Кўрғазмага келаётганларнинг аксарияти ўн тўрт ёшдан йигирма беш ёшгача бўлган ёшлардир.

Кўрғазмада келажақда қандай мутахассислик бўйича ўқишини олдиндан белгилаб олган кўплаб ўқувчиларни учратдик. Улардан бири Тошкент давлат шарқшунослик институти қошидаги академик лицей ўқувчиси Шоҳрух Баҳодиров. У хитой тили йўналишида Тошкент давлат шарқшунослик институтида ўқиш ниятида.

— Лицейга кирганимда келажақда мазкур олий таълим муассасасида ўқишни мақсад қилганим, — дейди Шоҳрух. — Мақсадим аниқ бўлса-да, кўрғазмага ўзим танлаган институт билан яқинроқ танишиш учун келдим. Билдимки, ўқишга киришим учун хитой тилидан ташқари, тарих, она тили ва адабиёт фанларини ҳам пухта ўзлаштиришим керак экан.



— Турли тортлар пишира оламан. Сартарошликка ҳам қизиқаман. Шу боис кўрғазмада «Ифбатли келин» ўқув маркази фаолиятини кузатиб, айнан ушбу марказда сартарошлик ҳунарини ўрганишни мақсад қилдим. Инглиз, немис тилларини яхши ўзлаштиряпман. Келгусида Тошкент шаҳридаги Халқаро Вестминстер университетиде иқтисод йўналиши бўйича ўқимокчиман. Бундай кўрғазмалар вилоятларда ҳам ташкил этилса, янаям яхши бўларди, — дейди Тошкент шаҳридаги 1-педагогика кол-



момлайман, — дейди у. — Шунинг учун олдиндан иш топишга ҳаракат қиляпман.

Кўрғазмага келган касб-ҳунари коллежлари ўқувчилари учун «Камолот» ЁИХ ёшларни касб-ҳунарга йўналтириш, уларда тадбиркорлик кўникмаларини шакллантириш учун лойиҳалар тақдимотини ўтказди. Шунингдек, мамлакатимиз ва бошқа давлатлардаги олий таълим муассасаларининг тақдимотлари, маҳорат дарслари ва ишга жойлаштириш кўникмалари бўйича танловлар ўтказилади. Кўрғазма якунида фаол иштирокчилар аниқланади ҳамда ташкилотчиларнинг диплом ва эсдалик совгалари билан тақдирланади.

Кўрғазма 13 февралга қадар давом этади.

Рустам ЮСУПОВ,
«Turkiston» муҳбири.
Рустам Назарматов
олган суратлар

Гуёҳвандлик, ичкиликбозлик, кашандалик, одам савдоси, диний экстремизм — беш таҳдид. Ёшлар маънавиятининг энг хавфли кушандалари бўлмиш бу иллатларни таг-томири билан қўпориш, турмуш тарзимиздан бутунлай сиқиб чиқариш учун саъй-ҳаракатлар қилинмоқда. Ҳар галги уринишларимизда ақалли битта тенгдошимизни бу таҳдидлар ботқоғидан қутқара олсак, мана шунинг ўзи ғалаба.

«Камолот» ЁИХ Фаргона вилояти кенгаши ташаббуси билан вило-

ятнинг барча туман ва шаҳарлардаги таълим муассасаларида «Биз —

«БЕШ ТАҲДИДГА БЕШ ЗАРБА»

иллатларга қарши курашишга қодир ёшлармиз!» лойиҳаси ўтказилмоқда. Лойиҳа доирасида қатор учрашув ва очиқ мулоқотлар, ёшларга ибрат бўлувчи видеоролик ва фильмларнинг намойиши ташкил этиляпти. Ҳаракатнинг Учкўприк, Қувасой, Қува, Фаргона, Қўштепа, Бағдод,

Кўқон туман ва шаҳар кенгашлари умумтаълим мактабларида, академик лицей ва касб-ҳунари коллежларида «Беш таҳдидга беш зарба» видеоролигини намойиш этди. Ҳозирда ушбу видеоролик намойиши ҳудудларда давом этмоқда.

Утказилган қатор очиқ мулоқотларда бугун жа-

миятимиз тараққиётига, юртимиз келажагига хавф солиши муқаррар бўлган бу иллатларнинг ёшлар онгини захарлаши, бунга қарши курашиш учун барча бирдек масъул эканлиги, бу борада, айниқса, педагоглар ва ота-оналар, кенг жамоатчилик янада диққат-этиборли бўлиши

алоҳида таъкидланди. Таҳдидлар кучли, бироқ, биз ҳам уларга зарба беришга қодирмиз!

Дилнавоз КҮЛДОШЕВА,
«Камолот» ЁИХ
Фаргона вилояти
кенгаши етакчи
мутахассиси



2014-yil — Sog'lom bola yili

■ Davlat mukofoti sovrindorlari ■

ТИНИБ-ТИНЧИМАГАН ОДАМЛАР

Навоийлик ёш фермер Хуршидбек Раҳмонов ишнинг кўзини биландиганлардан. У 2005 йилда Самарқанд қишлоқ хўжалиги институтининг агрономия факультетини тугатгач, бир йил ўтиб унумдорлиги настаксон гектар ерни ўзлаштириб, фермер хўжалигини ташкил этади. Дастлаб ўн нафар ишчи-ходим билан пахта ва галла етиштиришни бошлаган тенгдошимиз фермер хўжалиги таркибида чорвачилик фермасини йўлга қўйди. Фермада 380 бош қорамол парваришланмоқда. Унда ўн уч киши иш билан доимий банд. Чорвачилик фермасида сут ва гўшт маҳсулотлари етиштирилади. Бир кунда бир тонна сут соғиб олиниб, Навоий шаҳридаги «Шифобахисут» корхонасига етказиб берилмоқда.



Ёш тадбиркор фермер ўтган йили гўштни қайта ишлаш цехини ҳам ишга туширди. Бир кунда беш юз килограмм гўшт маҳсулотлари қайта ишланмоқда. Албатта, бундай ютуқларга ўз-ўзидан эришиб бўлмайди. Фақатгина кундузни кечага, кечани кундузга улаб ҳалол меҳнат қилган инсонгина шундай муваффақиятларга эришиши мумкин.

— Ишни бошлашдан аввал, унинг ҳуқуқий асосларини ўрганиб чиқдим, — дейди Қизилтепа туманидаги «Кубаро-Диёр» фермер хўжалиги раҳбари Хуршидбек Раҳмонов. — Бусиз бирор натижага эришимиз қийин бўларди. Чунки ўз ҳақ-ҳуқуқини тузук билмайдиган айрим касбдошларим иш фаолиятида муаммоларга дуч келганига гувоҳ бўлганман. Билишимни мустаҳкамлаш учун Тошкент молия институтини бухгалтерия ва аудитор йўналиши бўйича таълим олдим.

Пухта асосга эга иш чала қолиб кетмайди. Ишни, аввало, ўқиб-ўрганиш, соҳада тажриба тўплашдан бошлаган Хуршидбек каби ишбилармонларнинг ҳамиша омади келади. У таҳсил мобайнида тадбиркор ҳамиша аҳоли талабига кўра иш тутуши кераклиги, шунда ҳам халққа, ҳам ўзига фойда бўлиши мумкинлигини ўрганади. Эл манфаати ҳамиша устун, деган сўзини

қоида қилиб олди. 2008 йилда балиқчилик хўжалигини ҳам йўлга қўйган фермернинг айтишича, бугун олтита ҳовузда ўн минг тонна балиқ уруғи парваришланмоқда. Бир мавсумда аҳолига беш тоннагача балиқ етказиб беряпмиз, дейди у.

— Айни кунда туманимизда 425 та фермер хўжалиги фаолият кўрсатаёпти, — дейди Қизилтепа тумани фермерлар кенгаши бош мутахассиси Жонузоқ Эраев. — Хуршидбек раҳбарлик қилаётган «Кубаро-Диёр» фермер хўжалиги нафақат туманимизда, балки бутун Навоий вилоятида энг илғор хўжаликлардан бири. Хуршидбек Раҳмоновнинг ҳаракатлари билан туманда кўплаб ёшлар иш билан таъминланди. Унинг фермер хўжалиги ҳар йили давлат режаларини ортиги билан бажариб келмоқда. Ўтган йили ғалладан саксон, пахтадан қирқ центнердан ҳосил олди. Хуршидбекка ўхшаган фермерлар сафини кенгайтириш мақсадида ўтган йили тўртта ёш ўз фермер хўжалигини ташкил этди.

Тенгдошимиз етти хазинанинг бири бўлган товук фермасини ҳам ташкил этди.

— Бу йил сутни қайта ишлашни йўлга қўймоқчимиз, — дейди тиниб-тинчимас фермер. — Кичик корхона жойлашадиган бинони қуряпмиз. Сут маҳсулотларини тайёрлайдиган корхонамиз ишга тушса, яна йигирма нафар

тенгдошимиз иш билан банд бўлади. Бугун фермер хўжалигимиздаги эллик нафар ишчининг ярми касб-хунар коллежлари битирувчилари.

Қаерда инсон меҳнати қадр топса, ўша жойда фойз-барака, тараққиёт бўлади. Бугун мамлакатимизда инсоннинг қадрли баланд, унинг меҳнати эъзозда.

Конституциямизнинг 21 йиллиги арафасида Хуршидбек Раҳмонов Президентимизнинг «Юқори натижаларга эришган бир гуруҳ иқтидорли ёшларни мукофотлаш тўғрисида»ги фармони асосан, давлатимизнинг юксак мукофоти — «Шухрат» медали билан тақдирланди. Бу унинг ҳаётидаги энг қувончли воқеа бўлди.

— Мустақил диёрда туғилиб, замонавий таълим даргоҳларида ўқидим ва ўзим хоҳлаган касбни эгалладим, — дейди ёш тадбиркор фермер, «Шухрат» медали соҳиби Хуршидбек Раҳмонов. — Бундай юксак мукофот биз, ёшларни Ватанимиз равнақи йўлида янада кўпроқ меҳнат қилишга ундайди.

Улуғ мақсадлар сари қадам ташлаётган Хуршидбек каби тенгдошларимиз Ватанимиз тараққиётига катта ҳисса қўшажак.

Рустам ЮСУПОВ,
«Turkiston» муҳбири.
Сардор Муллажонов олган сурат

ДИҚҚАТ, ТАНЛОВ!

Журналистика соҳасида

«ОЛТИН ҚАЛАМ»

IX миллий мукофоти

Ўзбекистон Журналистлари ижодий уюшмаси Журналистларни қайта тайёрлаш халқаро маркази билан ҳамкорликда миллий ва халқаро журналистиканинг энг юксак ютуқларини кенг оммалаштириш, ОАВ ходимлари фуқаролик позицияларини намоён этишлари учун шароит яратиш ҳамда журналистларда танқидий фикрлашни ва ижодий фаолиятга янгича ёндашувларни шакллантириш мақсадида «Олтин қалам» IX Миллий мукофоти учун халқаро танловни ўтказди.

3 май – Жаҳон матбуоти эркинлиги кунига бағишланган бу танловга 2013 йилнинг 31 мартидан 2014 йилнинг 31 мартигача – бир йил давомида газета ва журналларда чоп этилган, радио орқали эфирга узатилган ҳамда телевидениеда кўрсатилган ва интернет нашрларида берилган материаллар 2014 йилнинг 10 апрелигача қабул қилинади.

Танлов голиблари учун қуйидаги мукофотлар таъсис этилган:

Журналистика соҳасида бош миллий мукофот. Голиб махсус диплом, «Олтин қалам» кўкрак нишони, статуеткаси ва Ўзбекистон Республикасида белгиланган энг кам иш ҳақининг 200 баробари миқдоридан пул мукофоти билан тақдирланади.

Асосий мукофотлар:

Энг яхши журналистик материал учун миллий мукофот (телевидение – 1-, 2-, 3-ўринлар);

Энг яхши журналистик материал учун миллий мукофот (радио – 1-, 2-, 3-ўринлар);

Энг яхши журналистик материал учун миллий мукофот (босма ОАВ – 1-, 2-, 3-ўринлар);

Энг яхши журналистик материал учун миллий мукофот (интернет-журналистика – 1-, 2-, 3-ўринлар).

Биринчи ўринни олган голиблар диплом, «Олтин қалам» кўкрак нишони, статуеткаси ва энг кам иш ҳақининг 160 баробари миқдоридан пул мукофоти билан тақдирланадилар.

Иккинчи ўринни олган голиблар диплом, «Олтин қалам» кўкрак нишони, статуеткаси ва энг кам иш ҳақининг 140 баробари миқ-

доридан пул мукофоти билан тақдирланадилар.

Учинчи ўринни олган голиблар диплом, «Олтин қалам» кўкрак нишони, статуеткаси ва энг кам иш ҳақининг 120 баробари миқдоридан пул мукофоти билан тақдирланадилар.

«Олтин қалам» танлови голибларини мукофотлаш, шунингдек, уни ўтказиш билан боғлиқ сарф-харажатлар Ўзбекистон Республикаси Олий Мажлиси ҳузуридаги Нодавлат нотижорат ташкилотларини ва фуқаролик жамиятининг бошқа институтларини қўллаб-қувватлаш жамоат фонднинг молиявий кўмагида амалга оширилади.

Шунингдек, қатор халқаро ташкилотларнинг Ўзбекистондаги ваколатхоналари ва республикадаги жамоат ташкилотлари ҳам ўз рағбатлантирувчи мукофотларини таъсис этган.

Танловга теле-, радио-, босма материаллар ҳамда интернет нашрларида эълон қилинган ишлар тақдим этилади (5 тадан кам бўлмаслиги керак).

Телевидение бўйича видеоматериаллар, ахборот ташувчи воситанинг қандай кўринишида бўлишидан қатъи назар, 3 минутдан 30 минутгача бўлиши керак.

Радиоэшиттиришлар (аудиокассета ёки системали диск) 5 минутдан 30 минутгача бўлиши керак.

Матбуот ва интернет материаллари асл нусхада ёки кўчирма нусхада тақдим этилиши лозим.

Танловга юборилган материалларга қуйидагилар илова қилиниши лозим:

— муаллифнинг исми-шарифи, профессионал фаолияти тўғрисида қисқача маълумот;

— муаллифнинг турар жойи, уй ва иш телефонлари;

— паспорт нусхаси.

Танлов голибларини тантанали мукофотлаш маросими 2014 йил 2 майда – Жаҳон матбуоти эркинлиги кунига арафасида «Turkiston» саройида ўтказилади.

Мукофот бир шахсга такроран берилмайди.

Материаллар «Олтин қалам» танловига деб кўрсатилган ҳолда қуйидаги манзилга юборилиши лозим:

**Ўзбекистон Республикаси, 100129,
Тошкент шаҳри, Навоий кўчаси, 30-уй. Ўзбекистон
Журналистлари ижодий уюшмаси 3-қават,
30-, 35-хоналар
Телефонлар: 244-64-61; 244-37-87.
www.Journalist.uz**



2014-yil — Sog'lom bola yili

БУНДА АЛПЛАР КАМОЛ ТОПАДИ

Сурхондарё азалдан кўкрак кетган полвонлари, моҳир чавандозлари билан машҳур. Воҳа ҳақида сўз кетганда барчанинг кўз олдига алқомат ўғлонлар ва Барчинойга келбат берадиган сулув қизлар гавдаланади.

Бугун мамлакатимизда чинакам қулоч ёзаётган спорт бу замин фарзандлари қалбига ҳам тўла кириб борди. Авваллари фақат миллий кураш, кўпқари сингари спорт турлари бўйича кўпроқ машғул бўлган ёшлар айтишга келиб, спортнинг ўнлаб турлари бўйича профессионал тарзда шуғулланмоқда. Жаҳон ареналарига чиқмоқда.

Хўш, бунга қайси омил замин яратди? Сурхон ёшларини янада олға чорлаган куч нима? Ҳеч иккиланмасдан айтмишмики, бу — Юртбошимиз раҳнамолигида бутун мамлакат бўйлаб спортга, спортсевар болаларга қаратилаётган юксак эътибор. Ҳа, болалар спорти — миллат келажиги омилларидан бирига айланди. Болалар спорти — мамлакат умиди, халқ кўз тиккан буюк мақсадларга йўл очаяпти.

МЕХР ИФОДАСИ — ИНШООТЛАР

«Болалар спорти объектларини куриш ҳеч қачон тўхтамайди. Бу борадаги ишлар изчил давом эттирилади. Азиз болаларимиз камол топадиган бу мажмуаларни шундай чиройли ва мустаҳкам этиб кураликки, бу биздан ўзига хос бир эсдалик, уларга меҳримизнинг ифодаси бўлсин».

Президентимиз Ислон Каримовнинг яқинда бўлиб ўтган Ўзбекистон Болалар спорти ривожлантириш жамғармаси Ҳомийлик кенгашининг навбатдаги йиғилишида айтган бу сўзларини тинглаган ҳар бир юртошимиз тўлқинлангани

рост. Негаки, эҳтимол, ҳар куни, камида кунора болалар спорти иншоотларига кўзимиз тушганда, ҳар биримизнинг кўнглимиздан умидли ҳислар ўтган. Фарзандларимизнинг, ука-сингилларимизнинг мана шундай замонавий, бир пайтлар биз учун орзу саналган, бугун ўша хаёлий истакларнинг ижобати бўлиб савлат тўкиб турган спорт комплекслари, стадионлар, теннис кортларига қараб кўзимиз яшнади.

Болалар спорти ривожлантириш жамғармаси маблағлари ҳисобидан 2003-2013 йилларда Сурхондарёда 115 та ана шундай иншоот курилиб фойдаланишга топширилди. Шундан 106 таси қишлоқ жойларда барпо этилиб, зарур спорт инвентарлари ва ускуналари билан жиҳозланганлиги эътиборга молик ҳодисадир. Ахир, бир пайтлар ўзимиз эмасмидик, спорт — фақат шаҳарликларнинг иши, ундан қишлоқ ёшларига нима наф, деган гапга чиппа-чин ишониб юрадиганлар? Бугун қишлоқларимиз кўркига кўрк қўшиб турган гўзал бинолардан бири албатта болалар спорти объекти бўлади.

САЛОҲИЯТЛИ МУРАББИЛАР

Сурхондарё вилоятида бугун 163365 нафар олти ёшдан ўн беш ёшгача бўлган болалар ва ўсмирлар спорт билан мунтазам шуғулланаётир. Улар орасида қизлар ҳам кўп. Шу ўринда диққатингизни бир рақамга қаратсак.

2003 йилда бутун вилоят бўйича олиб қараганда, атиги 94 нафар қиз бадий гимнастика билан шуғулланарди. Бир тарафдан, одамларнинг спортга бўлган муносабати, бошқа тарафдан шароитларнинг етарли эмаслиги боис қизлар спорт билан шуғулланиш имконига эга эмасди. Бугун вазият тамомила бошқача. Аввало, одамларда спортга бўлган муносабат ўзгарди. Қолаверса, зарур моддий техник база шаклланиб, шарт-шароитлар ҳам яхшиландики, бугунга келиб, Сурхон воҳасида тўрт мингга яқин қиз бадий гимнастика билан мунтазам машғул. Умуман олганда эса, вилоятдаги мавжуд 115 та спорт иншоотида 68746 нафар ўғил-қиз спорт билан шуғулланаяпти. Ушбу спорт иншоотларида 967 та спорт тўғараги фаолият кўрсатмоқда. Уларда бир кунда ўртача 28233 нафар ёш (шундан 9448 нафари қизлар) спорт билан мунтазам шуғулланиб келаётгани диққатга сазовордир.

Спортчи болаларга 486 нафар мураббий (шундан 128 нафари аёл мураббий) сабоқ беради.

ЭРТАНИНГ УМИДЛАРИ

Жисмоний тарбия ва спортнинг иккита асосий фойдали жиҳати бор. Биринчиси, у билан шуғулланган одам соғлом ва бақувват, иродаси мустаҳкам бўлади. Иккинчиси, у ўз ортидан катта ғалабалар ва эл-юртга шодлик олиб келади.

Сурхондарёлик спортчи болалар эришаётган зафар-

лар ҳам анча салмоқли. Мазкур муносабатларда иштирок этиб, фахрли ўринларни қўлга киритди. Халқаро мусобақаларда эса сурхондарёлик 97 нафар спортчи юртимиз шарофтини муносиб ҳимоя қилди. Улардан 47 нафари совриндор бўлди. Жумладан, ўн икки нафар таэквондочилар ўғил-қиз Малайзиянинг Куала-Лумпур шаҳрида ўтказилган халқаро турнирда иштирок этган эди. Ўн олти давлатдан 1150 нафар таэквондочилар орасида сурхондарёлик спортчилар ҳам муносиб қатнашди. Улардан олти нафари совринли ўринларни қўлга киритгани қувонарлидир. Мазкур мусобақада жарқўрғонлик Моҳира Раимова ҳам қатнашиб, 3-ўринни қўлга киритган.

— Таэквондонинг WTF йўналиши бўйича тўрт йилдан буён шуғулланиб келаман, — дейди Моҳира Раимова. — Халқаро миқёсдаги мусобақада биринчи бор қатнашган бўлсам ҳам, кўп ҳаяжонланганим йўқ, Чунки устозларимиз ҳаммиша ўз кучимизга ишонишимиз кераклигини ўқтирадилар.

Кураш бўйича халқаро мусобақалар ғолиби Рустам Эргашевнинг айтишича, Жарқўрғон туманида болаларни спортга жалб қилиш ва уларнинг мунтазам шуғулланиши учун барча шароитлар яратиб берилган.

— Болаларни спортга жалб этар эканмиз, уларнинг нафақат қизиқишларига, балки иқтидорларига ҳам алоҳида ёндашамиз, — дейди Рустам Эргашев. — Боланинг иқтидорини қанча эрта аниқласак, бу унинг келажиги учун шунча муҳим ўрин тутди.

Шеробод туман болалар ва ўсмирлар спорт мактабининг футбол мураббийи Равил Юсуповнинг таъкидлашича, чемпионларни тарбиялашда психологияни билиш жуда муҳим.

— Ўттиз олти йиллик таж-

рибамга таяниб айта оламаники, ҳузурингизга келган ёш спортчи учун сизнинг мураббийлик малакангиздан ҳам кўра, инсонийлигингиз кўпроқ аҳамиятга эга, — дейди Равил Юсупов. — Сизнинг машғулоти тўғри ташкил этишингиз, аниқ ва фойдали кўрсатмаларингиздан ташқари, ишончингиз ҳам шогирдингизнинг келгусида етук спортчи бўлиб улғайишига хизмат қилишини унутманг, дейман ёш ҳамкасбларимга.

Дарвоқе, ўтган йили ушбу туманининг «Килкон» маҳалласида иккита сунъий қопламали мини футбол майдони куриб фойдаланишга топширилди. Уларда энди маҳалла ёшлари истаган вақтда қўшни маҳалладан келадиган тенгдошлари билан ўртоқлик учрашувлари, мусобақалар ташкил этишадиган бўлди.

ФУТБОЛСЕВАРЛАР УЧУН ЯНГИЛИК

Ҳа, айтгандек, яна бир янгилик. 2014 йилда вилоятда 28 та янги сунъий қопламали футбол майдони барпо этилиши режалаштирилган. У амалга ошса, Сурхондарё ёшлари учун яна бир ажойиб имконият пайдо бўлади. Ахир, не-не футбол юлдузлари ҳам ўз вақтида маҳалла ва мактаб майдонларида тўп тепиб улғайишганда. Бу хабардан, айниқса, севимли «Сурхон» жамоаларининг Ўзбекистон чемпионати олий лигасида иштирок этишини анча соғиниб қолган вилоят спорт ихлосмандлари кўнглида ёруғ ниятлар пайдо бўлган бўлса, ажаб эмас. Уларнинг кўнглидан, бунёд этилажак янги футбол майдонларида вилоят футболининг эртанги умидлари бўй кўрсатиб қолар, деган умидбахш истак ўтишига шубҳа қилмаймиз.

Наргиза РАҲМАТУЛЛАЕВА,
«Turkiston» муҳбири

So'z gulshani

НАВОИЙ ИЗДОШЛАРИ

Тонгда ажиб бир ҳисдан қувониб ўйгондим. Шодлигимнинг боиси — бугун Навоий ҳақида ёзмоқни ният қилганман. Ишни улуг шоир музейга саёҳат қилишдан бошламан. Ҳаммаёқда мутафаккир шоирнинг муборак исми акс-садо бериб турибди. Навоий метросидан чиқиб, бироз юрач, Навоий кўчасига қадам босаман. Улкан оқ қоюзга ўхшаб турган қишқи майдондаги дарахтлар қоп-қора сиёҳ билан кўҳна имлода битилган Навоий байтларини ёдга солади.

Олтин тусга бўялган музей биносидан қалбимда илиқлик сезаман. Табиат билан уйғунлашиб кетган шоир руҳини ҳис қиламан. Музей қаршисида худди мени кутиб тургандай таассурот қолдирувчи шоирнинг ҳайкалтарош тасаввурларидаги ўйчан нигоҳлари (Навоий ҳайкали)га дуч келаман. Мусаввир табиат оппоқ қор билан шоир салласини оқ рангга бўяб қўйган, белини халқ хизматидаги сириб боғлаган шоир устига яқингина кийиб, қўлда китоб билан тонг сайрига отланиб келаётгандай. Кўчадан

ўтиб-қайтаётган машиналарнинг шовқини шоир хаёлларига заррача халақит бермайди. Хаёлимдаги Навоий билан (ҳар бир қалбнинг ўз Навоийси бор) обдон саломлашгач, нақшинкор эшиклардан ичкарига йўл оламани. Мени истараси иссиқ бир аёл (бино ходимаси) қарши олади. Опа мақсадимни англагач, хурсанд қиёфада йўл бошларкан, мени Навоий таваллудига бағишлаб ўтказилаётган тадбирга таклиф қилди. Тадбир ўтказилаётган залга кириб, ўриндиқларни тўлдириб ўтирган ёшлар қато-

ридан жой оламани. Минбарда Навоий сиймоси ҳақида фахрланиб сўзлаётган университетда дарс берган ўқитувчим Ҳамидулла Болтабоев сўзларига диққат қиламан. Домла ўз нутқи орқали талабаларни Навоий ижодини ўрганишда фаол бўлишга чақиради. Навоий дунёсига фақат унинг туғилган кунинда эмас, ҳар куни мурожаат қилиш лозимлигини таъкидлайди. Шу каби бошқа домлалар ҳам бирма-бир сўзга чиқишади. Тадбир якунлангач, домлалар билан биргаликда талабаларга қўшилиб музейга қўйилган экспонатлар билан танишишга ошиқамиз. Саёҳат давомида менга ҳамроҳлик қилаётган Тошкент архитектура ва қурилиш институтининг иккинчи курс талабаси Мафтуна Назарова Навоий туғилган қалбда туғилган туйғуларини мен билан ўртоқлашмоқчи эканини билдиради. Мен унинг сўзларига жон деб қулоқ соламан. У бугунги ёшларнинг Навоийга муносабати ҳақида

тўлқинланиб гапирар экан, ўзини қувонтирган бир воқеани сўзлаб берди.

— Мен яқинда ёш бир хонанданинг Навоий газалини эстрада йўналишига солиб айтган қўшиғини эшитиб қолдим, — дейди у. — Тенгдошимнинг ушбу экспериментга қўл урганини кўриб, жуда ҳам қувониб кетдим. Чунки у қўшиқни яхши кўйлади ва бу билан мусиқа билимдони бўлган Навоий газалини замонавий йўлда ҳам ижро қилиш мумкинлигини амалда синаб кўрди.

Мафтуна суҳбати давомида Навоий байтларидан мисоллар келтирди. Унинг:

**Кўргали ҳуснунгни зору
мубтало бўлдим санга,
Не балолиғ кун эдиким,
ошно бўлдим санга?!**

каби сатрларни мароқ билан ўқиганини кўриб, қувончимга қувонч қўшилди. Навоийга муносиб издошлар этишиб келаётганидан кўнглим фаҳр ва ифтихорга тўлиб, уларни сиз билан ўртоқлашишга шошилдим.

Насрулло ЭРГАШ,
«Turkiston» муҳбири

■ Kuchli davlatdan — kuchli fuqarolik jamiyati sari ■

ИСТЕЪМОЛЧИЛАР МУРОЖААТИ ЭЪТИБОРДА

Баъзан шунақа вазиятлар ҳам бўлиб туради. Кимдир буни оддий англашилмовчилик сифатида баҳо-ласа, яна биров унга лоқайдлик оқибати деб қарайди. Тўғриси айтганда, иккинчиси ҳақиқатга анча яқин. Бунга юртдошларимиздан тушаётган шикоят хатлари билан танишиш, уларни ўрганиш жараёнида янада кўпроқ амин бўлаяпмиз.

Қашқадарё вилояти Косон туман истеъмолчилар ҳуқуқларини ҳимоя қилиш жамиятига ўтган йил давомида юртдошларимиздан йигирмата мурожаат келиб тушди. Ариза ва шикоятлар тегишли тартибда ўрганилиб, истеъмолчилар фойдасига беш миллион сўмдан ортиқ етказилган зарарлар ундириб берилди. Сўзимиз қуруқ бўлиб қолмасин, мисолларга ўтайлик.

Косон тумани «Октепа» маҳалла фуқаролар йиғинида яшовчи Ғофур Жумаев туман истеъмолчилар ҳуқуқларини ҳимоя қилиш жамиятига ариза билан мурожаат қилиб, электр таъминоти корхонаси томонидан ноқонуний тарзда 500 минг сўм қарздорлик ҳисобланаётганлиги тўғрисида билдирган.

Ушбу мурожаатни мутахассислар ўрганишганда, Ғ.Жумаевга нисбатан ҳақиқатан ҳам 499842 сўм қарздорлик асоссиз тарзда ҳисобланганлиги аниқланди.



Масала шу ҳолича қолгани йўқ, албатта. Ҳақиқат қарор топиб, қарз бекор қилинди.

Туманнинг «Нартиблан» маҳалласида яшовчи фуқаро Давлат Холмуродовнинг мурожаатида келтирилган ҳолат ҳам

шунга ўхшаш. У ўз ариза-сида «Косонтумангаз» филиали томонидан ноқонуний равишда газ тўловларидан қарзлар белгиланганлигини маълум қилади.

Мурожаатни ўрганиш жараёнида туман газ идораси томонидан Давлат Холмуродовга 349647 сўм ортиқча қарздорлик ҳисобланганлиги маълум бўлди ва мазкур қарз-

сифатсиз маҳсулотлар сотилиши оқибатида истеъмолчига моддий зарар етказилаётганлигига доир мурожаатлар ҳам келиб тушмоқда.

Жумладан, туманнинг «Пахтазор» маҳалласида яшовчи фуқаро Бобир Баҳриев ўз мурожаатида Косон деҳқон (озик-овқат) бозори ҳудудида савдо қилувчи Эркин Сатторовдан 340 минг сўмга сотиб олинган велосипед сотувчи олти ойга кафолат берган бўлса-да, ўн кунга ҳам бормасдан яроқсиз ҳолга келиб қолганлигини кўрсатади.

Мурожаат тегишли тартибда ўрганилиб, истеъмолчи Б.Баҳриевга велосипедни сотиб олиш учун тўланган 340 минг сўм ундириб берилиши таъминланди.

Ҳуқуқини билган қоқилмайди, деб шунга айтсалар керак-да. Шу билан бирга ҳар бир инсон ўз бурчини ҳам тўғри англаши, унга риоя қилиши лозим. Истеъмолчиларга асоссиз қарзларни «юк-лаб» кетаётганлар, уларнинг ҳақини поймол этишга уринаётган кимсалар ҳам ўзларининг касб бурчларини тўғри англаганларида эди...

Шавкат ЖУМАНОВ,
Косон туман
истеъмолчилар
ҳуқуқларини ҳимоя
қилиш жамияти ижро
этувчи аппарати
раиси.
Шавкат КАРОМОВ,
«Turkiston» мухбири.

■ Jurnalning yangi soni ■

КУТИЛГАНДАН ҲАМ ЗИЁДА

«Yosh kuch» журналининг янги сони наширдан чиқди. Журнал бу сонда ўз муштарийларига янада қизиқроқ мақолаларни тақдим этди. Унда ўсмир-ёшларнинг бугунги кундаги муаммолари ва уларнинг ечимлари, интилишлари ва қизиқишлари, уларга яратилаётган имкониятлар ва уларнинг эришаётган муваффақиятлари билан танишиши мумкин. Халқимиз минг марта эшитгандан кўра, бир марта кўрган афзал, деб бежиз айтмаган. Шундай экан, келинг, журнални бир варақлаймиз.



маркази ва ЎзМТРК «O'zbekiston» телерадиоканали ҳамкорлигида ўтказилаётган «Уйла, изла, топ!» интеллектуал ўйинининг савол-жавоблари эълон қилиб борилмоқда. Эндиликда, муштарийлар ўз билимларини доимий чарқлаб боришлари мумкин.

Шунингдек, «Абитуриент», «Шукрона», «Долзарб мавзу», «Инновация» рукнларида ҳам бир қанча қизиқарли, ранг-баранг мавзуларда мақолалар эълон қилинди. Буларнинг барчаси, ёшларимиз келгусида ўз йўлларини танлашлари, мақсадларини аниқ қўйишлари учун яхши кўмакчи бўлади.


Жавохир КАРОМАТОВ,
«Turkiston» мухбири

Журналнинг учинчи саҳифасида «Ёшларга яна бир имконият» сарлавҳаси остида «Йилнинг энг фаол журналисти» кўрик-танлови ҳақида батафсил маълумот берилган. Унда танловда иштирок этиш шартлари ва унинг тартиби билан танишиш мумкин.

«Тарбия» рукни остида ёзилган «Интернет, компьютер технологиялари ва уларнинг бола тарбия-

сидаги аҳамияти» мавзуидаги мақолада интернет тармоғининг яхши ва ёмон тарафлари, компьютер ўйинларининг аслида қандай мақсадларга хизмат қилишига атрофлича тўхталиб ўтилган. Мақолада бир қанча ҳаётий мисоллар ҳам келтирилган.

Журналнинг мазкур сонидан Республика Халқ таълими вазирлиги, Ўрта махсус касб-хунар таълим



Антиқа қарор

Франция пойтахти Парижда бир қанча ишламайдиган метро бекатлари жамоат жойларига айланиши мумкин.

Бундай таклифни шаҳар мэри лавозимига номзод бўлган Натали Костюшко-Морице илгари сурди. Сиёсатчи аёлнинг асл касби архитектор бўлгани сабаб, шаҳар инфраструктурасига катта эътибор беради. Унинг фикрича, муомалада бўлмаган станциялардан ресторан, бассейн, театр ёки концерт зали сифатида фойдаланиш мумкин. Бу ҳатто туризм соҳасига ҳам сезиларли фойда келтиради. Айтилган пайтда шаҳарда ўн олтинчи метро бекати ишламайди. Улар иккинчи жаҳон уруши сабаб 1939 йилда ёпилган эди. Агар Костюшко-Морице мэр лавозимига сайланадиган бўлса, метро бекатларидаги бошпанасизларни чиқариб юборади.

Қинғир ишнинг қийиғи

Саудия Арабистонининг Хайл шаҳрида яшовчи фуқаро қулоғидан йигирма йил аввал беркитган шпаргалка (жавоблар ёзилган қоғоз) чиқариб олинди.

Исми ошкор этилмаётган бу шахснинг яширган қоғози умуман эсидан чиқиб кетган. Орадан йигирма йил ўтиб, қулоқ оғриғи билан шифокорга мурожаат қилган. Шифокор унинг қулоғидан жавоблар ёзилган қоғозни чиқариб олган. Маълум бўлишича, у шпаргалкадан фойдаланмасдан ҳам имтиҳонларни муваффақиятли топширган. Саудия Арабистонида бу фуқаро қисмати «тайёргайёр» ўқувчиларга тартибни бузишнинг аянчли оқибатига мисол қилиб кўрсатилмоқда.

«Ҳозирча ўқиб туришсин»

Ҳиндистонда нашр этилган саккизинчи синф дарслигида 59 та фактларга доир ва мингдан зиёд орфографик хатолар топилди.

Мисол сифатида улардан бирида 1945 йилда Япония атом бомбасини АҚШга ташлагани келтирилган. Аслида эса тескариси бўлган эди. Бу билан Гужарат штати таълим кенгаши томонидан нашр қилинган китоб муаллифлари ўз билимларининг қониқарсиз эканлигини билдириб қўйишган. Хусусан, китобда Маҳатма Ганди ўлимнинг санаси билан боғлиқ, Ҳиндистон тарихидаги шаҳарлар номи билан боғлиқ, ЮНЕСКО ва БМТ ҳамда карбонат ангидрид газининг номини нотўғри ёзиш билан боғлиқ бўлган кўпол хатоларни учратиш мумкин. Нашр учун масъул бўлган кўмита раҳбари сўзларига кўра, китобларни қайта йиғиб олишнинг иложи йўқ. Келажақда эса бундай хатоларга йўл қўймасликка ҳаракат қилинади.

Табиат инжиқликлари

Сўнгги кунларда Японияда бўлаётган қор бўрони натижасида ҳалок бўлганлар сони ўн уч нафарга етди.

Шунингдек, бўронлар натижасида икки мингга яқин одам жабрланган. Токиода 27 сантиметр қалинликда қор ёғиб, қирқ беш йиллик рекорд янгиланди. Электр таъминоти Ибаракки, Фукусима ва Мияги префектураларида издан чиқиши натижасида икки мингга яқин хонадон чироқсиз қолди. Синоптиклар бўрон ҳали анча давом этишини башорат қилишди.

Интернет манбалари асосида
Жавохир ЗАРИФ ўғли тайёрлади



ДИҚҚАТ, ТАНЛОВ!



Футбол ўйнашнинг, футбол ҳақида ўйлашнинг қотираман, деган, юрагида ўти бор мухлислар учун зўр имконият!

«ИНТЕЛЛЕКТУАЛ ФУТБОЛ»

ТАНЛОВ-ВИКТОРИНАСИ

Викторинада иштирок этиш жуда осон! Сиз газетамизда эълон қилинадиган Ўзбекистон ва жаҳон футболга оид саволларга ўз вақтида тўғри жавобларни йўллаб борсангиз, кифоя. Танлов шу йилнинг **30 июнигача** давом этади. Унда энг кўп очко тўплаган уч нафар мухлис Бразилияда бўлиб ўтадиган жаҳон чемпионати финали олдидан тақдирланади. Танловда **30 ёшгача** бўлган мухлис ва мухлисалар қатнашишлари мумкин.

7-савол:

Ўзбекистон чемпионати олий лигасининг биринчи энг яхши тўпурари ким?

Жавобингизни intellekt_sport@mail.ru электрон манзилига савол эълон қилинган кундан бошлаб бир ҳафта ичида ўзингиз ҳақингизда қисқача маълумот ва телефон рақамингиз билан бирга жўнатишингиз лозим.



БИЛИМИ ВА ЗУККО ЁШЛАР

Навоий давлат кончилиқ институти қошидаги

Зарафшон академик лицейида «Президент асарлари билимдони» танлови бўлиб ўтди. Унда ўқувчилар учта — савол-жавоблар, «кластер» чизмаси, Президент асарлари тақдироти шартлари бўйича ўзаро беллашди.

— Бизда кишини доим маънавиятига, жасоратга чорловчи Президент асарларининг билимдони бўлишни орзу қилмайдиган ўқувчи йўқ, — дейди лицейнинг ўқув ишлари бўйича директори ўринбосари Фолиб Маҳмудов. — Шу боис мазкур танлов аънавий тарзда ўтказиб келинади. Иштирокчилар Президент асарларидан олган билимларини дўстлари билан ўртоқлаша-

ди, энг асосийси, улар мустақил китоб мутолаа қилишга одатланади.

Қатнашчилар танловнинг биринчи шартиди Президент асарлари бўйича берилган саволларга беш дақиқа ичида жавоб беришди. «Кластер» чизмасида улар саволли катакчаларни жавоблари билан тўлдиришди. Сўнгра ҳар бир иштирокчи асарлар бўйича ўзларининг тақдимо-

тини қилишди.

Ҳакамлар ҳайъати билимдонларнинг саҳнада ўзини тутиши, мустақил фикри, дунёқараши ва билим даражасига қараб беш баллик тизимда баҳолади. Баллар ҳисоб-китобига кўра, биринчи ўринни лицейнинг 1-курс ўқувчиси Гулноза Аманова кўлга киритди. Иккинчи ўринни Моҳира Раббаноева олган бўлса, Нигора Раимовага учинчи ўрин насиб этди. Билимдонларга диплом ва совғалар топширилди.

Баҳорой ПАРДАЕВА,
Навоий давлат кончилиқ институти қошидаги
Зарафшон академик лицейи ўқитувчиси

Металлар бирикмаси	Ўйирма гап, муболага	Иш бор жойда ... бор	Тропик мева	Таъмирлаш, тузатиш жойи															
	Рисқиев (боксчи)	Инок, тотув			Қоровул, посбон	Шошмай	Матбуот			Она (татарча)									
			Ижозат, изн	Муаллим															
					Чўзи-луван конфект	Совғалик кийим-бош													Таксимча, тарелка
			Озгин	Ўрта Осиёдаги миллат			Ўғил бола исми												
					Ғалаба ҳайкириги	Моҳир, уста													
			Яқун, поён	Шиш															
Махсус зиёфат	Тьерри (футболчи)	Дастлаб, биринчи	Банди, тутқун		Италиядаги қийиқ минора														Бўш коф ... турмас
					Йирик саноат корхонаси														

Тузувчи: Фаҳриддин Раҳимов

Javohir

Заҳириддин Муҳаммад БОБУР

Ҳазон япроғи янглиғ гул юзунг ҳажрида сарғардим,
Кўруб раҳм айлагил, эй лоларух, бу чехраи зардим.

Сен, эй гул, қўймадинг саркашлигингни саредек ҳаргиз,
Аёғингга тушуб, барги хазондек мунча ёлбордим.

Латофат гулшанида гул киби сен сабзу хуррам қол,
Мен арчи даҳр боғидин хазон япроғидек бордим.

Хазондек қон ёшим, сориг юзумдин эл танафурда,
Ба ҳар ранге, биҳамдиллах, улусдин ўзни қутқордим.

Не толеғдур мангаким, ахтари бахтим топилмайди,
Фалак авроқини ҳар нечаким дафтардек ахтардим.

Улуснинг таъну таърифиди манга, Бобур, баробардур,
Бу оламда ўзумни чун ямон-яхшидин ўтқардим.

Katta tanaffus

ҚИЗИҚАРЛИ ВА ФОЙДАЛИ САЁХАТ

Тошкент давлат техника университети талабалари «Камолот» ёшлар ижтимоий ҳаракати бошланғич таъкилотининг «Бунёдкор» стадионида ўтказган «Спорт бизни дўстлаштирар» саёҳатида иштирок этди.

Ўз нафар талаба қатнашган ушбу саёҳат ёшлар ўртасида соғлом турмуш тарзини фаол тарғиб этиш, спорт мусобақаларига жалб қилиш ва ўзаро маданий-спорт алоқаларини йўлга қўйиш мақсадида ташкил этилди. Талаба-ёшлар кўркам «Бунёдкор» стадионида жойлашган Ўзбекистон футбол тарихи музейи, матбуот-анжуманлар зали, миллий терма жамоамизнинг кийиниш хонаси ва уйин майдонида бўлдилар.

Саёҳат давомида «Камолот» фаоллари стадион ҳодимларидан ўзларини қизиқтирган саволларга жавоб олдилар.

— Биз юртимизда ёшлар учун яратилаётган имкониятлардан ва шарт-шароитлардан жуда хурсандмиз. Дунёдаги тенгдошларимиздан олдинда бўлишимиз мумкин, лекин ортда қолганимиз йўқ, — дейди Тошкент давлат техника университети талабаси Зикрилло Маҳмудов.

Талабалар стадиондан чуқур таассурот билан қайтидилар.

Жавоҳир КАРОМАТОВ,
«Turkiston» муҳбири

ЗУККО МУХЛИСГА САВОЛ:

«...Андижоннинг ғарбида. Андижондан етти йиғочлик йўлда. Яхши шаҳарча, неъматларга бой: анори ва ўриги жуда кўп ва яхши.

«Ҳидоя» асари муаллифи (унинг) Рушдон номли кентидандир...»

«Бобурнома»дан олинган мазкур матнда қайси шаҳар ҳақида сўз бормоқда?

Жавобингизни **14 февраль** соат **16.00** га қадар **233-79-69, 233-95-97** рақамларига кўнгирак қилиб беришингиз мумкин. Биринчи бўлиб тўғри жавоб йўллаган мухлис номи газетамизда эълон қилинади.

Ўтган сондаги саволнинг жавоби: Лутфуллоҳ. Тўғри жавобни биринчи бўлиб Тошкент шаҳридан Давлат Исмоилов йўллади.

YON DAFTARCHANGIZGA

Халиқ ўлғон сохийдин элга бўлди икки бахшойиш,
Ҳам эҳсонидин оройиш, ҳам ахлоқидин осойиш.

Алишер НАВОЙЙ

Turkiston

МУАССИС:

«КАМОЛОТ»

ЁШЛАР ИЖТИМОЙ ҲАРАКАТИ
МАРКАЗИЙ КЕНГАШИ

Газета Ўзбекистон Республикаси
Матбуот ва ахборот агентлигида 2007
йил 19 апрелда
№ 0242 рақам
билан рўйхатдан
ўтган.

ISSN 2010-6996



9 772010 699000

Бош муҳаррир:

Ашуров Салим Тўраевич

Таҳрир ҳайъати:

Баҳодир Фаниев, Меҳриддин Шуқуров (бош муҳаррир ўринбосари — «Turkiston»), Элмурод Нишоннов (масъул котиб — «Turkiston»), Ирина Кочергина (бош муҳаррир ўринбосари — «Молодёжь Узбекистана»), Елена Калинина (масъул котиб — «Молодёжь Узбекистана»), Рустам Қосимов

Навбатчи муҳаррир:

Умарова Наргиза Баҳодировна

Саҳифаловчи:

Рўзиев Зафар Хусанович

Газета таҳририят компьютер марказида терилди ва саҳифаланди.

Таҳририят манзили: 100029, Тошкент, Матбуотчилар кўчаси, 32.

Телефонлар:
(371) 233-95-97. (371) 233-79-69
e-mail: info@turkiston.uz

«Шарқ» наشريёт-матбаа акциядорлик компанияси босмахонасида, А-3 форматда чоп этилди. Ҳажми — 2 босма табок. Корхона манзили: «Буёк Турон» кўчаси, 41.

Индекслар: 203, 3203
Баҳоси келишилган нархда.

Буюртма Г-257.
Адади — 12819
Босишга топшириш вақти — 21.00
Топширилди — 22.50
ЎЗА якуни — 21.20

Офсет усулида босилган.

1 2 3 4 5 6